

第一輯：

發刊詞·序·堂史·堂徽

發

刊

辭

黃詩通

新加坡潮州江夏堂，創立於遜清同治六年（公元一八六六年），逾五載而滿一世紀。其歷史之悠久，視乎其他宗族團體，不愧落後，足見我宗親對於崇德報功，敦宗睦族之觀念，深且固也。邇者諸宗親以本堂欣逢九十五週年堂慶紀念，緬懷先賢之慘淡經營，為策後起之淳勵發揚；况年久代湮，文獻散軼，若不及時衷集，付之剞劂，奚足以垂永徵信？爰有本紀念刊之出版焉。

回顧本堂草創之初，旨僅祭祀祖先祠墓，繼始擴為互助團結之組織。考其發展過程，約可分為三個時期：初營公墓於泰山亭，供宗親每歲祭祀之用，此為第一時期也；同治六年，復於泰山亭建置祠宇，雖因陋就簡，然訂立每歲農曆三月十五日舉行公祭，祭畢公讌，即於此時開端，此第二時期也；迨民國十七年（公元一九二八年），祠宇重建，肯構肯堂，正式成立董事會，主司祭祀諸務，此第三時期也。迄於今茲，祭祀悉仍舊貫，公讌歲歲舉行。「敦宗族以昭雍穆」，先哲明訓，信不誣也。

茲者本刊付梓在即，謹陳數義，願與我宗親共勉之：

一曰崇德報功：夫人之有祖先，猶木之有本，水之有源也。我潮州黃氏自始祖諱峭山公以降，系出一源。朱柏廬治家格言云：「祖宗雖遠，祭祀不可不誠」，旨哉斯言，我人欲昭追遠報本之心，其於祖先，烝嘗禴禘，安可不虔誠維謹，以發揚我華族倫理之至德，此為我宗親所當共同服膺者一也。

二曰協和萬邦：人類不能遺世而獨處，故先哲以「格致正誠修齊治平」為立身處世之指針。書曰：「以親九族，九族既睦，協和萬邦」，處此多元民族之本邦社會，尤應以我華族此種美德為基礎，由小團結而大團結，此為我宗親所當共同服膺者二也。

三曰互助精神：所謂互助精神云者，猶老子之「守望相助疾病相扶持」者也；濟緩急，憫困窮，排難解紛，止訟息爭者是也；他如壽婚喪葬之事，躬與慶弔，亦是也，此為我宗親所當共同服膺者三也。

詩通不敏，謬膺本屆主席，然因俗務蠅集，於堂務未能多所建樹，私心竊不禁惴惴焉。謹抒所懷，弁之刊首，宗親賢達，不吝指教，企予望之。

潮州江夏堂九十五週年特刊序言

君復曾心影謹撰

潮州江夏堂，溯源黃帝軒轅之苗裔，伯翳之後，嬴姓分封，但見於正式紀錄者，則始自周代，肇國於河南省潢川縣域，又廣韻稱：黃姓出於江夏陸終之後，受封於黃，因以為姓。

至春秋時代，黃國歸楚後，散為士族，子孫益蕃，楚國名相黃歇統春申君，相楚二十餘年，蔚為江漢大邦，門客常三千人。當時與齊孟嘗君，趙平原君，魏信陵君，並譽稱名於戰國。

黃氏自先秦後，至於漢代，異人並出，賢良相繼，如黃香之孝德，博學能文，當時京師號曰：「天下無雙，江夏黃童」，如黃霸得尚書正傳，治行稱天下第一，皆黃氏先賢歷史之佳話也。

自漢而後，代有賢人，由中州至海岱，由三楚至於百越，積善黃族，忠孝傳芳，含弘光大，為國禎祥，朔南暨至於海表月窟之炎洲。

中國百家姓——氏族，追遠於不祧始祖，昭穆世系，歷千秋而萬祀。凡氏族肇基之邦，子孫分聚之鄉，則為宗廟之禮，以祀乎其列祖列宗，若宗教家之祀上帝，而為傳代無窮之精神。

中華民族五千年之文化，以孝為人倫之大本，人類之道心，所謂「天之所覆，地之所載，日月所照，霜露所墜，凡有血氣者，莫不尊親」。推此尊親之義，而普及於天下人之親，則天下為愛之天下，愛之社會，愛之國家，愛之大同矣，此尊親之道德，將歷萬祀而常新，為首出庶物，保合大和之精神。

當潮州江夏堂九十五週年特刊出版，想見黃族，奕世孝德，正如子華子之言曰：「昔者軒轅二十五宗，故黃作行於天下」。謹以此序其立言不朽之價值。

序

沈時霖

讀孔孟書，凜水源木本義。誦古今史，盡仰事俯蓄責。入孝出悌，序昭穆於一堂。光前裕後，聯聲氣於四海。仁民愛物，遵守古聖遺訓。倫常道德，奉行先賢示範。華人壯志凌雲，商周時代，漸次向外展拓，梯山航海遠來。先民乘風破浪，唐宋以降，粵閩南渡尤衆，披荆斬棘是邦！櫛風沐雨，不避山嵐瘴氣。胼手胝足，弗驚虎饕為鄰。筮路藍縷，荒坵蔚成重鎮。精誠所至，金石竟為我開。

南洋諸地，各族以誠相待，呼兄喚弟，親逾骨肉。天下一家，水乳交融難別，推心置腹，安危與共。太空移植在即，青雲有階可登，前途光輝絢爛，識時務營謀稱俊傑。各族和平同處，團結宜須永恆，建國必定完成，憑血汗工作者巨人！

潮汕瀕海，天寶物華，世有鄒魯之譽，民富冒險精神。星馬接壤，地傑人靈，夙稱海外桃源，終成世界國邦。潮人初履斯土，經之營之，慈善公益教育，義安公司歷有貢獻。鄉賢舉辦福利，生者死者，團結互助經濟，萬世順勞績不可忘！長輩澤蔭，安可湮沒無聞。守成有責，豈容漠視諉飾。今值潮州江夏九五盛典，發動纂印追思紀念特刊。編者惠函問序於予，祇得班門弄斧獻拙。

黃氏始祖雲公，軒轅七世孫也！南極天現黃雲，真除黃國，因之賜姓黃氏。雲公哲嗣熊啟，郡封江夏，成為地方望族。黃河九曲，源遠者則流長。翠栢千尋，根深者則葉茂。歷代簪纓，人才濟濟，支派蕃衍，瓜瓞綿綿！

政尚寬和，吏民愛敬（黃次公）士稱無雙，孝列廿四（黃香）計獻苦肉，破曹首功（黃蓋）勇定軍山，智克夏侯（黃忠）義當正國，志在勤王（峭山公）工文長詩，尤善草書（黃庭堅）格物致知，學承朱子（黃榦）循法驅賊，謙居屠夫（黃延新）參芪治病，症癘傷寒（黃維周）被執成仁，洪範明義（黃道周）畫擅山水，人物益精（黃璧）復我漢族，推倒滿清（黃興）璨耀朗星，多不勝舉。

時乎不復來！潮州江夏堂。由先知先覺者組織，本樹木樹人之嘉猷。光大承先啟後祖訓，發揚敬宗睦族德業。鳩工庀材，集賢美輪美奐。同心協力，廣續肯構肯堂。暢叙天倫樂事，求感情益融洽。秉賦孝思不匱，崇享乃祖峭山。創制建祠垂統，服膺博愛為懷。定期虔誠祭祀，依時如儀禮拜。克紹箕裘，繩其祖武。誠能格天，日益熾昌。永錫爾類，咸頌宜哉！

或謂方今之世，侈談氏族，跡近封建落伍，智者不為？然而見仁見智，優良道德，最貴報本崇功，以身作則。譬諸休假紀念，旨叻慎終追遠。奚況親親之誼，粉榆情重。應知孝孝誠意，詩禮攸關。

貴堂肇造迄今，倏忽九十五年。繼志述事，令人嚮往。百尺竿頭，轉瞬立臻百齡。萬載傳芳，家聲永振萬世。董其事者，皆是時賢俊彥。出版特刊，藉資後人景仰！

辛丑年中秋佳節敬撰

序

周漢人

夫江夏者，軒轅帝裔，黃姓郡名，華夏之望族也。

攷其賜姓所自，遠在五帝之世，軒轅六世孫——陸終公之次子雲公受封黃國（今河南省光州）始，以國為姓。當封國之日，天降黃雲，現於南極，姓氏開端，禎祥之象乍現；箕裘克紹，已兆興隆之徵矣！之後，宗支蕃殖，流遠四方，耕讀為家，仕途顯達；為中華民族巨姓。而雲公祀典，亦歷千秋萬世不替；尊為黃氏之始祖也。

至江夏郡名所由來，則肇始於黃氏第二世祖熊啟公。受封於江夏，後以其地為郡名（即今湖北省黃州府黃岡縣）。自是，蠡斯衍慶；蘭桂騰芳，蔚成今日盛族，實良有以也。

稽諸黃姓世系氏譜，英才輩出，載譽古今，後先媲美；在華胄中國，實不讓他姓專美於前；雖海天萬里之地，亦同斯優越焉。夫丁旺則族盛；才華則人貴，此名門望族所由來。蕃衍分流，派系繁殖；遍及莽莽神州，遠達雲海山陬，或聯宗成鄉，或聚族為村。財丁富貴，繼承不替，忠義孝悌，為世所稱，豈無因哉！

新加坡「潮州江夏堂」，顧名思義，我潮黃姓氏會之組織也。其崇奉之始祖，乃彰州郡武派系之峭山公也。公生當唐代，卒於後周，享天年八十有二，福壽全歸。一代名臣，千秋始祖。蓋棺定論，功垂百世；追維德業，祀享萬載者，實由公偉大政績與仁慈宏德有以致之。

良以一國之強弱，有賴政治之修明。一姓之興衰，有賴德業之修為耳。若能上體天心，下順人情，種善因，得善果；致祥永祚，自在其中。黃氏派系，江夏子孫，得有今日之繁盛者；實叨其列祖列宗修為德業之遺澤！而後繼裔孫能遵循祖訓耳。

遠在九十五年前，今本邦「潮州江夏堂」先賢之輩，秉耕讀遺訓，凜敦睦之旨；勸立團結機構，為潮人組織氏會先聲；其高瞻遠矚眼光，親愛親仁表現；誠足為後輩者示範於永恆。樹互助良風，行安危實惠於族人者；應歸功彼先輩締造遺澤，歷屆董職員通力發揚之偉績也。

為崇本報功，追維祖德；為紀念先賢，慎思遺澤；為世系集譜，以明源流；為堂史存真，備作文獻。該堂本屆董職員，濟濟多士，有鑑乎此，特作空前創舉，編纂「潮州江夏堂九十五週年紀念特刊」單行本。蒐集寶貴材料，行將付梓焉。

漢人生性疎慵，天賦愚蠢，筆非江郎，才豈司馬；辱承 貴刊編委會諸君，不以謏陋庸愚見棄，惠函徵文，致意殷殷；既感受寵若驚，又愧膚淺之無。嗟我耄耋已老，難揮生花妙文，何敢率爾擷管，紙上隨意塗鴉，而貽大雅之羞。顧自知才不勝任，但婉却又感不恭。迫不獲已，聊書茲篇塞責！敬請讀者指正之。

據悉，該刊分輯精編，書厚數百版。內容豐富，材料充實；詞藻文麗，琳瑯滿目；錦綉大作，洛陽紙貴。不但光前裕後，為該堂寫下光榮新一頁！亦無殊世系族譜堂史一部文獻巨帙。行見出版之日，於慶祝盛典之中，餽贈嘉賓與堂員，將被視同拱壁而珍藏焉。

本

堂

史

畧

黃武獅

夫我江夏——黃氏，潮之望族也。系出軒轅帝裔，至我峭山公，分流蕃殖，人丁頗增，遍及全潮。洎乎明末清初，不少我潮黃氏先賢，憤異族憑凌，痛山河失色，遂以孤臣子遺，遠走南溟，而家於斯者，為數日衆。本堂之誕生，實拜受此輩先賢高瞻遠矚之締造也。遠在百年之前，我旅星故宗賢，有鑑於族氏南來者日衆，雖家馬於斯，北望故園，追維祖德之念更殷；良以木本水源，豈可因遠離而疎祀典乎？為使後代子孫，知世系源流所自，庶不致數典而忘祖焉！以是，我黃氏先賢，遂營始祖——峭山公衣冠塚於泰山亭之原，歲時祭祀無缺，以表緬懷德業；聊伸報本之心，歷年不替。此種感人孝思，誠足為吾輩示範焉。

當是之時，我氏先賢，仍感雖有祖墓以作祀典，若缺乏祠宇建設，無法作敦宗睦族以資聯絡為憾！觀感所及，同具此念，遂由福盛號黃再全，坤豐號黃坤炎君，仙舟等君，出而倡導，幾經奔走，而本堂祠宇，卒於民國紀元前四十五年（即遜清同治六年丁卯）落成矣。至是祠貌粗具，族衆歡欣，萬年宗基團結構構，於焉肇始，而蔚成後此之輝煌成就也。

然而，當年初建祠宇，椽木而築，非常簡陋，在炎陽風雨，長年剝蝕之下，墻垣墜塌，頹圮不堪，爰於民國十七年，由熱心派下裔孫：蔚廷、理欽、芹生、文科、炎森、錫權、端昌等君倡議新之，獲族人熱烈響應，踴躍捐資，共成偉舉；祠即大興土木，築廊種樹植槐，臨流引水，煥然一新；於是年冬竣工蒞事，後先互映；雖非大規模，但已堂皇許多，於發揚光大處，母負締造先賢之期望矣！當時被公舉赴聯邦等地向宗人勸募之募捐委員如端昌、子芳、炎森、如川、文彬五君，不辭舟車與唇舌之勞，勸募成績頗佳，功在本堂！正喜完成使命邁歸，不幸炎森君中途因病棄世，為本堂服務而損軀，至感哀悼焉。

於堂史始末，已略述如上文，遺漏之處，敬希我賢達宗人指正之。至今茲屹立於新加坡泔水港十二哩——廣德山之原之偉大崇塋——始祖峭山公塚墓，亦經一度遷葬，才蔚成此規模巨塚焉。遷葬之議，是起因於民國四十一年，當時該山（泰山亭）擬經營建築，凡先人墓穴於斯者，須一律遷葬。在此情形之下，我峭山公祀事多年之崇塋，不得不另謀他遷。是年冬，由裔孫漢三、芹生、錫權、筱思、詩通、得民暨現各屆董事等，僉議捐資遷葬於現地。至民國四十二年十一月廿四日，妥奉 公神主於廣孝山之岡，而續修祀典不替。

武獅不敏，頻年以來，追隨本堂歷屆宗賢之後，對光大祖德，以及能擴大敦睦互助等事，靡不悉力共赴，以盡職責。於本堂此日作空前創舉，編纂九十五週年紀念特刊單行本，作他年稽攷史獻，不才如我，竟敢不自量學識膚淺，率爾操觚為文，無殊貽笑大雅。但為本堂歷史存真起見，就所知者濡筆誌之，至文詞未加修飾，非所計也。

徽 堂

